

道教宗源

原夫道家由肇起自無先垂跡應感生乎妙一從乎
妙一分為三元又從三元變成三氣又從三氣變生
三才三才既滋萬物斯備其三元者第一混洞太無
元第二赤混太無元第三冥寂元通元從混洞太無
元化生天寶君從赤混太無元化生靈寶君從冥寂
元通元化生神寶君太洞之跡別出為化主治在三
清境其三清者玉清上清太清是也亦名三天其三
天者清微天禹餘天大赤天是也天寶君治在玉清
境清微天其氣始青靈寶君治在上清境禹餘天其
道教宗源

氣元黃神寶君治在太清境大赤天其氣元白故九
天生神章經云此三號雖殊本同一也此三君各為
教主即三洞之尊神也其三洞者洞真洞元洞神是
也天寶君說經十二部為洞真教主靈寶君說經十
二部為洞元教主神寶君說經十二部為洞神教主
故三洞合成三十六部尊經第一洞真為大乘第二
洞元為中乘第三洞神為小乘從三洞而又分四輔
曰太元太平太清正一也太元輔洞真太平輔洞元
太清輔洞神正一通貫洞輔總成七部又從三洞
開各分十二類者第一本文第二神符第三玉訣第

四靈圖第五譜錄第六戒律第七威儀第八方法第

九象術第十記傳第十一讚誦第十二表奏其本文
者乃經之異稱生法之本既生之後即須扶養故次
以神符八會雲篆三元玉字若不諳練豈能致益故
須玉訣釋其理事也衆生暗鈍直聞聲教不能悟解
故立圖像助以表明聖功既顯若不祖宗物情容言
假偽故須其譜錄也此之五條生物義定將欲輔成
必須鑿戒惡法文弊宜前防止故有戒律既捨俗入
道出家造於師寶須善容儀故次明威儀既前乃防
惡宿罪未除故須修齋軌儀悔已生惡也儀容既善
道教宗源

宿根已淨須進學方術理期登真要假道術之妙顯
乎竹帛論聖習學以次相從也學功既著故次以記
傳始自生物終乎行成皆可嘉稱故次以讚誦又前
言諸教多是長行散說今論讚頌即是句偈結辭既
切功滿德成故須表申靈府如齋說言功之例故終
以表奏也